

**МОНГОЛ УЛСЫН ЗЭВСЭГТ ХҮЧНИЙ ЖАНЖИН ШТАБЫН ДАРГЫГ
ТОМИЛОХ ТУХАЙ МОНГОЛ УЛСЫН ЕРӨНХИЙЛӨГЧИЙН САНАЛЫГ
ЗӨВШИЛЦСӨН ТАЛААРХ АЮУЛГҮЙ БАЙДАЛ, ГАДААД БОДЛОГЫН
БАЙНГЫН ХОРООНЫ САНАЛ, ДҮГНЭЛТ**

2022 оны 11 дүгээр
сарын 01-ний өдөр

Улаанбаатар
хот

Илтгэгч нь: Улсын Их Хурлын гишүүн Н.Энхболд

Улсын Их Хурлын дарга, эрхэм гишүүд ээ,

Монгол Улсын Ерөнхийлөгчийн тухай хуулийн 13 дугаар зүйлийн 8 дахь хэсэг, Зэвсэгт хүчний тухай хуулийн 11 дүгээр зүйлийн 11.1.10 дахь заалтыг үндэслэн Монгол Улсын Ерөнхийлөгчөөс Зэвсэгт хүчний Жанжин штабын даргыг томилох саналыг зөвшилцөхөөр 2022 оны 10 дугаар сарын 26-ны өдөр Улсын Их Хуралд өргөн мэдүүлснийг Аюулгүй байдал, гадаад бодлогын байнгын хороо 2022 оны 11 дүгээр сарын 01-ний өдрийн хуралдаанаараа хэлэлцлээ.

Монгол Улсын Ерөнхийлөгчөөс өргөн мэдүүлсэн саналыг Байнгын хорооны хуралдаанаар хэлэлцэх үед Улсын Их Хурлын гишүүн Ш.Адъяаа гадаад улс оронд ажиллах цэргийн атташег томилохдоо ямар байр суурь баримтлах, энхийг сахиулах ажиллагаанд оролцогчдын цалин хөлс, хангамж болон үүрэг гүйцэтгэх хугацаанд үүсэж байгаа зөрчлийг хэрхэн шийдвэрлэсэн талаар, Улсын Их Хурлын гишүүн Б.Баттөмөр энхийн бүтээн байгуулалтын ажилд оролцож байгаа зэвсэгт хүчний анги, салбарыг тендер зарлахгүйгээр тодорхой бүтээн байгуулалтын ажилд оролцдог эрх зүйн орчныг бүрдүүлэх, дотооддоо цэргийн хувцас, хэрэглэл, хүнсний бүтээгдэхүүнээр 100 хувь хангахад анхаарах, хугацаат цэргийн алба хаах хугацааг 1,5-аас 2 жил болгон нэмэгдүүлж, эзэмшсэн мэргэжилтэй халагддаг болгох, Улсын Их Хурлын гишүүн Д.Ганбат хугацаат цэргийн алба хаагчийн эрүүл мэнд, амь нас хохирсон, халдварт сүрьеэ өвчин гарсан анги, салбарын удирдлагад хариуцлага тооцсон эсэх, Зэвсэгт хүчний Жанжин штабын удирдлагуудын боловсрол, мэдлэгийг дээшлүүлэх сургалтад шат дараатайгаар хамруулах, хээрийн сургуулийн бэлтгэлийг улс орны эрх ашиг, нөхцөл байдал, гадаад бодлоготой уялдуулан зохион байгуулдаг болох талаар ажлын хэсэг болон нэр дэвшигчээс тодруулан асууж, хариулт авсан.

Хуралдааны үеэр Улсын Их Хурлын гишүүн Н.Энхболд Орон нутгийн хамгаалалтын тухай хуулийн хэрэгжилтийн явц байдал, цаашид авах арга хэмжээний тухай, Үндэсний аюулгүй байдлын зөвлөл, Улсын Их Хурал, тухайн асуудлыг эрхлэх Байнгын хороонд зэвсэгт хүчний хангалт, төсөв хөрөнгийн талаар холбогдох мэдээллийг өгдөг байх, кибер аюулгүй байдалд анхаарах, Улсын Их Хурлын гишүүн Ц.Сэргэлэн цэргийн анги, салбарын удирдагч өөрийн ажлын туршлага, ур чадвараа байнга дээшлүүлдэг байхаас гадна төрлийн цэргийн командлалын удирдлагын боловсрол, ажлын ур чадварыг нэмэгдүүлэх, бүтцийг бодит байдалтай нийцүүлэхэд анхаарч ажиллах нь зүйтэй гэсэн болно.

Улсын Их Хурлын гишүүн Н.Наранбаатар цаашид цэргийн хувцас, формыг дүрмийн дагуу хэрэглэдэг байх, энгийн хүмүүс өмсөж, хэрэглэж байгааг цэгцлэх, хугацаат цэргийн алба хаагчдын эрүүл мэнд, амь нас хохирох явдлыг таслан зогсоох, дунд шатны дарга, удирдлагуудтай холбоотой харьцаа хандлага, ёс зүйн зөрчил гарч байгааг болон цэргийн алба хаагчдыг бүтээн байгуулалтын ажилд

оролцуулахдаа хөдөлмөрийн аюулгүй байдал, хамгааллын асуудлыг орхигдуулж байгааг анхаарах, эцэг эх, ар гэрт нь тухайн цэргийн алба хаагчийн талаарх мэдээллийг нээлттэй хүргэдэг утастай болгох, цэргийн эрдмээс гадна мэргэжлийн сургалт явуулахад анхаарч, тухайн аймаг, орон нутгийн хөдөлмөр, халамжийн үйлчилгээний газар, мэргэжлийн сургалт, үйлдвэрлэлийн төвтэй хамтарч ажиллах, мэргэжлийн үнэмлэх олгох, орон нутагт байрлах цэргийн анги, салбарын барилга, тоног төхөөрөмжийг шинэчлэх, тохижуулах, их засвар хийх шаардлагатай байгаа талаар санал хэлсэн болно.

Түүнчлэн Улсын Их Хурлын гишүүн Д.Бат-Эрдэнэ зэвсэгт хүчний нийт бие бүрэлдэхүүн монголоороо бахархах, эх оронч үзлийг нэмэгдүүлэхэд анхаарах, “Тэмүүжин-Өрлөг” цэргийн сургуулийн үйл ажиллагааг хөдөө, орон нутаг дахь цэргийн анги, салбарын дэргэд явуулж, хүүхдэд багаас нь эх орноороо бахархах хүмүүжил олгох, төлөвшүүлэх, монголын ирээдүйд шаардлагатай байгаа инновац, технологийн шинэчлэлд онцгой анхаарах, энэ чиглэлээр офицер, албан хаагчдыг бэлтгэх, Улсын Их Хурлын гишүүн Т.Доржханд Монгол Улс батлан хамгаалахын салбарын хувьд боловсон хүчний нөөц сайтай гэж үздэгээ илэрхийлээд, хээрийн сургуулийг зохион байгуулах цаг хугацааг улс төрийн болон тухайн үеийн нөхцөл байдлыг харгалзаж тогтоодог байх, мэдээллээ олон нийтэд зөв түгээх шаардлагатай байгаа талаар саналаа илэрхийллээ.

Мөн Улсын Их Хурлын гишүүн Б.Энх-Амгалан цэргийн анги, салбараас эхлээд рот, батарейн захирагчаар ажиллаж, мерит зарчмаар дэвшсэн, салбартаа 29 жил тасралтгүй ажилласан нэр дэвшигчийг дэмжиж байгаагаа илэрхийлээд, Улсын Их Хурлын гишүүдийн хэлсэн саналыг ажилдаа хэрэгжүүлж, өөрчлөгдөж байгаа дэлхий ертөнц, бүс нутгийн нөхцөл байдал эгзэгтэй энэ үед зэвсэгт хүчний зэвсэг, техникийг шинэчлэх, шинэ дэвшилтэт техник, технологи, инновацийг нэвтрүүлэх, зэвсэгт хүчний бие бүрэлдэхүүнийг чадавхжуулах, туршлагажуулах, эмнэлэг, инженерийн ротыг бэхжүүлэх, энхийг сахиулах ажиллагаанд цэргийн алба хаагчдыг оролцуулах, улс орны стратегийн томоохон бүтээн байгуулалтад барилга-инженерийн ротыг оролцуулж байгааг дэмжих, бүс нутгийн аюулгүй байдал, хөрш орнуудын харилцаанд анхаарал хандуулж ажиллах нь зүйтэй гэсэн болно.


Монгол Улсын Зэвсэгт хүчний Жанжин штабын даргаар Сүнрэвийн Ганбямбыг томилох тухай Монгол Улсын Ерөнхийлөгчийн саналыг Байнгын хорооны хуралдаанд оролцсон гишүүдийн олонх дэмжсэн болно.

Улсын Их Хурлын эрхэм гишүүд ээ,

Монгол Улсын Зэвсэгт хүчний Жанжин штабын даргыг томилох тухай Монгол Улсын Ерөнхийлөгчийн саналыг зөвшилцсөн талаарх Аюулгүй байдал, гадаад бодлогын байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**АЮУЛГҮЙ БАЙДАЛ, ГАДААД
БОДЛОГЫН БАЙНГЫН
ХОРООНЫ ДАРГА**



Б.ЭНХ-АМГАЛАН